

Jon-ate kaapiya nyendoos

Vakasin metumin-ate

1 ¹Hey naanêl vu ham naambe omaaho vakasin metumin-ate ond yoo nando munggin in va pin, tombe hey hango osin hey aahe lak hey amekaalus, yik hey aahe keen osin hey namangg lôôh. ²^bMetumin-anju tok laam langaah atombe hey aahe, ondeey hey natulin osin hey naanêl langaah vu ham nambe metumin danggata-têênju nando having Mangganaan, le tok laam langaah vu hey. ³De va sen hey naahe osin hey nangoyin-ato, ond hey natulin vu ham having in nambe ham alompayo javuh ti gaving hey, tombe yiyi pin yalonggpayo javuh ti gaving Aamangg ayuuh Noow Yesu Kalisi. ⁴^cVakasin-anjo hey kaavu vu ham in nambe yahengg anivasa lôôt.

Anutu ond melangaah danggakook

⁵^dIn banye sen hey hango vu Anutu Noow-ambe hey naanêl langaah vu ham-ato, ond nambe Anutu melangaah danggakook, de mekanu daka me-neep vu yi le, malis lôôt. ⁶^eOm yiyi naanêl naambe yiyi ahondoos Anutu be yalonggpayo lavuh ti, lemu yiyi nala mop amekanu, ond yiyi navu tatuhin-ambe yame naawiing va lohvu vakasin keen-ato le. ⁷Nganjo naambe yiyi nando monaawiing va hôôk melangaah, nambe sen Anutu nando hôôk melangaah alopayôd-to, ond mem yiyi nando osin yalonggpayo lavuh ti, tonde Noow Yesu-te nihees navu kawiiy yate nipaya pin nala.

⁸^fLe yiyi naanêl naambe yate nipaya ma, ond yiyi navu tatuhin yiyi, tombe vakasin keen-ame neep hôôk yalonggpayo le. ⁹Nganjo yiyi naanêl yate nipaya langaah, ond Anutu omaaho nivalok om le biing gaving yite vakasin-ambe kawiiy yate va nipaya na, de jipis yaningook pin na vêl. ¹⁰Yiyi naanêl naambe yame aawiing va nipaya le, ond manyinjo yaanêl

^a 1:1 Jon 1:1-2,4; 1Jon 2:13-14 ^b 1:2 Jon 1:14 ^c 1:4 Jon 16:24 ^d 1:5 1Ti 6:16; Jem 1:17
^e 1:6 1; Jon 2:4; Jon 3:21 ^f 1:7 Ais 2:5; Hiblu 9:14; Taato 1:5; 7:14 ^g 1:8-9 Saam 32:5; Pro 28:13

nambe Anutu omaaho tatuhin vaha, tonde yite vakasin-ame lokaale yalonggpayo le.

Kalisi nahôôvu yiyi

2 ¹ Sa noongg-aso, sa navu kaavu vakasin-anjo vu ham in nambe ham-ame ambiing va nipaya le, lemu ti nambe biing va nipaya, ond yate omaaho sen kataangg Mangganaan in yiyi-ato nando, ond yik omaaho nivalok Yesu Kalisi. ² In Yesu Kalisii-ju ond yate mop timu sen Anutu kawiiy yate va nipaya na, le me-yate nipaya yooow e, nganjo hil pin-ate nipaya.

³ Naambe yiyi navu samu Anutu-te tanasin ond mem yalak ni vanuh nambe yalak Anutu ni keen. ⁴ Omaaho ti naanêêl naambe, “Sa lak Anutu ni,” lemu me-navu samu yite tanasin e, ond yi omaaho tatuhin ambu de vakasin keen-ame lokaale lopayo le. ⁵ De ti sen navu samu Anutu-te vakasin-ato, ond yite lopayo doos having Anutu keenaanôôn. Nambêênju ond mem yalak ni keen nambe yalonggpayo lavuh ti having Anutu. ⁶ Omaaho ti nanêêl nambe “Sa longgpayo timu having Anutu,” ond omaaho tii-ju yoo sapa mop anivalok naambe Yesuu-to.

Hil sen ahend having halindin-ato ond dando hôôk melangaah

⁷ Sate va-so, same navu kaavu tanasin moos ti vu ham e, nganjo sa navu kaavu tanasin bôôy sen yoo neep vu munggin-ato, de tanasin bôôy-anjo ond vakasin sen ham hango lung laa-to. ⁸ Lemu tanasin sen sa navu kaavu vu ham-anja ond yik tanasin moos, de Yesu navu taato nambe tanasin-anjo keen, de ham navu taato having, in mekanu nalung nala de melangaah keen tum laam lung la.

⁹ Omaaho ti naanêêl naambe lokando melangaah alopayo, lemu nayi hali paya lôôt, ond naahen nando hôôk mekanu lôôt-ambe gêên. ¹⁰ Le naambe ti ahe naving hali, ond yoo nando hôôk melangaah alopayo, de va nipaya ti me-neep hôôk lopayo in nambe biing-ambe dupake le. ¹¹ Nganjo omaaho sen nayi hali paya lôôt-ato ond nando hôôk mekanu, tombe nala mop osin mekanu, om doosin mop sen nalaa-to in taaku mekanu wiing-ambe mekaalus amekanu hôôk lung la.

¹² Sate unoopasiv-aso, sa kaavu laas vu ham in Anutu ka navu Yesu be kawiiy hamate va nipaya la vêêl. ¹³ Aamangg-aso, sa kaavu laas vu ham in ham alak omaaho sen yoo nando nyendoos-ato ni. Maanggêêm-aso, sa kaavu laas vu ham in ham laanggôôl omaaho nipaya Saalang lung la.

^h 2:1 Hiblu 7:25; 9:24 ⁱ 2:2 1; Jon 4:10,14; Jon 1:29; 11:52; Kol 1:20 ^j 2:4 1; Jon 1:6,8

^k 2:5 Jon 14:21,23; 1Jon 4:12,17; 5:3 ^l 2:6 Jon 13:15 ^m 2:7 2Jon 5-6; 1Jon 2:24; 3:11

ⁿ 2:8 Jon 1:9; 13:34; Lom 13:12 ^o 2:9 1; Jon 3:10,15; 4:20 ^p 2:10 Lom 14:13; Jon 11:9

^q 2:11 Jon 11:10; 12:35 ^r 2:12 1Ko 6:11 ^s 2:13 1; Jon 1:1; Jon 1:1

¹⁴Sate unoopasiv-aso, sa kaavu laas vu ham in ham alak Aamangg ani. Aamangg-aso, sa kaavu laas vu ham in ham alak omaaho sen yoo nando nyendoos-ato ni. De maanggêem-aso, sa kaavu laas vu ham in nambe ham atu hil aniwêêk-ambe Anutu-te vakasin lukaneep ham alompayo, om ham laanggôl omaaho nipaya Saalang lung la.

Yahengg-ame gaving va voon-ate le

¹⁵Ham ahem-ame gaving va voon-ate le. Omaaho ti nambe ahe gaving va voon-ate ond ahe me-naving Aamangg e. ¹⁶In va pin sen nando hôôk va voon alopayôd-to, yik yalonggpaya nawiing navu navu, osin menôôn, be yiyi hatee yiyi ak in yate va voon-ate, ond me-laam vu Aamangg e, nganjo yoo vu voon-anjo. ¹⁷Voon osin va voon-ate pin sen hil dawiing mend nôôn in-ato ond nalung nala, nganjo omaaho sen yoo monawiing va lohvu Anutu kaa-to ond nando in mando danggata.

Omaaho sen nyiis ngaamong vu Kalisii-to

¹⁸Unoopasiv-aso, yiyi aalokalaam busin taamusin ahus-anjo. Ham hango bôôy nambe omaaho sen nyiis ngaamong vu Kalisii-to navu naam, ond gêên hil sen dayiis ngaamong vu Kalisii-to ngeeyaata lalaam lung la, om yalak ni nambe busin ahus-ato manyinjo. ¹⁹Hil-anju lavuuh yiyi, lemu yame yate hil sil e. Nambe yate hil sil ond sil e mando gaving yiyi, le ma de sil lavuuh yiyi, ond taato nambe sil pin ond yame yate hil sil e.

²⁰Le ham ond Vavi Vaambuung lakala ham lung la be ham pin alak vakasin keen ani. ²¹Me-nambe sen ham doosin vakasin keen ondeey sa kaavu kaapiyaa-jo laas vu ham e, nganjo soo kaavu in ham alak vakasin keen ani osin ham alak ni nambe vakasin tatuhin ti me-laam vu vakasin keen alopayo le.

²²Om lati omaaho tatuhin vaha? Omaaho sen lak alu in Yesu nambe yi me-omaaho sen Anutu yoo holin yi vulôôt-ato le, ond yik omaaho sen lak alu in Anutu yuuh Noow-ato, ond manyinjo omaaho sen nayiis ngaamong vu Kalisii-to. ²³Hil pin sen lalak alund in Noow, ond Anutu me-nando having sil e, le ti nambe naanêêl langaah naambe Yesu ond Anutu Noow yi, ond Mangganaan Anutu nando having yi.

²⁴Vakasin sen ham hango nyendoos-ato ond ham naapuvu tatin. Naambe ham samu vakasin sen ham hango bôôy-ato niwêêk hôôk ham alompayo, ond mem ham e mando dôôk maayuuu Mangganaan alondpayo. ²⁵De jôôy vakasin vu yiyi nambe le biing-ambe yiyi mando metumin danggata.

¹ 2:15 Lom 8:7; Jem 4:4 ² 2:16 Lom 13:14; Jem 4:16; 1Pi 2:11 ³ 2:17 1Ko 7:31; Mat 7:21

⁴ 2:18 1Pi 4:7; Mat 24:5,24; 2Jon 7 ⁵ 2:19 Sin 20:30; 1Ko 11:19 ⁶ 2:20 1Ko 2:15;

1Jon 2:27 ⁷ 2:22 1; Jon 4:3; 2Jon 7 ⁸ 2:23 Jon 5:23; 15:23; 1Jon 4:15; 5:1; 2Jon 9

⁹ 2:25 Jon 3:15; 6:40

²⁶Vakasin-anjo sa kaavu vu ham lak hil sen lawiingin nambe tatuhin ham-ato. ²⁷^cLemu ham ond Kalisi wiing yite Vavi Vaambuung laas lakala ham-ambe nando, om omaaho ti me-naanêl tanasin vu ham gaving e, in

Vavi Vaambuung navu tatekin va pin vu ham, om Vavi Vaambuung-ate vakasin-anja me-vakasin tatuhin e, nganjo vakasin keen. Om ham oo anggulis Kalisi baambu lôôt nohvu Vavi Vaambuung nêl vu ham-ato.

²⁸^dUnoopasiv-aso, gêên-anjo ham oo mando hôôk Kalisi lopayo in nambe busin sen nom-ato ond yiyi baale niwêêk gaving yi, de yame yanningg naamum vu yi le. ²⁹^eHam alak ni nambe Anutu omaaho nivalok, ond ham anjak ni naambe hil pin sen sil dawiang va lohvu-to, ond Anutu wiing-ambe sil latu yite noondin.

Anutu noow-aso yiyi

3 ¹^fHam akam bu le, Anutu nêl nambe yite noow-aso yiyi ond taato nambe ahe yoo having yiyi bopaata lôôt, om yite noow-aso yiyi keen ondeey hil voon doosin yiyi, in dangga nambe sil doosin Anutu.

²^gSate va-so, gêên yaatu Anutu-te unoopasiv, de vu taamusin yale mando naambe va? Vaa-ju me-neep langaah e, om yiyi doosin, lemu yalak ni nambe Kalisi naatok nom atombe yale naatu naambe yi, in yale aangge yi keen. ³Tonde hil pin sen kand navu vaa-jo be danggin busin-anjuuto, ond sil oo davu samu sil alondpayo nivasa lôôt lohvu sen Kalisi yoo nando nivasa lôôt-ato.

⁴Hil pin sen dawiang va nipayaa-to ond davu kalêêh Anutu-te tanasin, in va nipaya ond manyinjo vakasin kalêêsin. ⁵^hHam alak ni nambe Kalisi laam in nambe kawiiy va nipaya na, in va nipaya ti me-neep hôôk Kalisi lopayo le. ⁶ⁱHil pin sen yoo dando hôôk Kalisi lopayôd-to ond me-dawiang va nipaya le, tonde hil pin sen dawiang va nipayaa-to ond sil-ame lalak Kalisi ni keen e, nganjo sil doosin.

⁷^jUnoopasiv-aso, ham-ame ambiing gaving hil-ate vakasin tatuhin e. Hil sen mondawiang va nivasaa-to ond sil hil anivalok nambe sen Kalisi omaaho nivalok-ato. ⁸^kDe hil sen mondawiang va nipayaa-to ond silate danggakook neep vu Saalang. In Saalang ond yoo monawiang va nipaya vu bôôy nyendoos lôôt-ambe nandôd-jo, lemu Anutu Noow ond laam in nambe kawiiy Saalang-ate kul na valok-ate. ⁹^lHil sen latu Anutu-te noondin-ato ond me-dawiang va nipaya le, in Anutu-te nôôn metumin nando hôôk sil, om sil-ame lalohvu nambe lambiing va nipaya le, in sil latu Anutu-te noondin lung laa-to. ¹⁰Vaa-jo navu taato Anutu-te unoopasiv-aso de Saalang-ate unoopasiv-aso, in hil sen me-dawiang

^c 2:27 Jon 14:26; 16:13 ^d 2:28 1; Jon 3:2; 4:17 ^e 2:29 1; Jon 3:7,10 ^f 3:1 Jon 1:12-13; 16:3 ^g 3:2 2Ko 3:18; Pil 3:21 ^h 3:5 2Ko 5:21; 1Pi 2:22-24; 1Jon 2:2 ⁱ 3:6 Lom 6:1-2,14 ^j 3:7 1Jon 2:29 ^k 3:8 Jon 8:44 ^l 3:9 1; Jon 5:18

va nivalok-ato de ahend-ame naving halindin e, ond Anutu me-yite unoopasiv-aso sil e.

Ham ahem oo gaving ham

¹¹ ^mVakasin sen ham oo hango vu bôôy nyendoos-ato ond nambe yahengg oo gaving yiyi. ¹² ⁿDe yame naambe Adam noow Kain e, in Kain ond Saalang-ate unoopasiv ti tombe yiis hali be yimb. De yiis halii-ju in dangga nambe vaati? Yik yiis in dangga nambe yoo monawiing va nipaya de hali monawiing va nivasa.

¹³ ^oHalingg-aso, naambe hil voon lanjji ham paya lôôt ond ham-ame kam yu-yuuh e. ¹⁴ ^pYahengg naving Omaaho Bop-ate hil om yalak ni nambe yiyi havuuh mop yimbin-ate lung la, de yiyi naaloh mopaatôôv metumin-ate. De omaaho sen ahe me-naving hil-ato le ond naahen naloh mopaatôôv yimbin-ate. ¹⁵ ^qOmaaho sen yoo nayi hali paya lôôt-ato ond lohvu omaaho sen yiis omaaho ango be yimb-ato. Tonde ham oo alak ni nambe omaaho sen yiis omaaho ango be yimb-ato, ond me-naloh mop sen na mando metumin danggata-têeto le, malis. ¹⁶ ^rOm nambêênja yalak ahe havingin danggakook ani nambe Kalisi yoo vu yi la doos-ambe yimb in dôôvu yiyi, om yik yiyi oo aambu yiyi na doos in dôôvu yiyi halingg-aso ond mem nivasa. ¹⁷ ^sLe naambe omaaho ti-te va voon-ate nando, le yi nambe hali nativak in vati, lemu lopayo niwêêk-ambe me-hôôvu le, ond ahe me-having Anutu le, malis lôôt.

¹⁸ ^tUnoopasiv-aso, ahe havingin-ame nanjip ak yavingg osin yiyi dalaangg malis amu le, nganjo yaambiing nôôn jak osin yahengg gaving keenaanôôn.

Yalonggpayo niwêêk-ambe yiyi baale Anutu me

¹⁹ Yahengg gaving naambêênjo ond mem yanjak ni naambe Anutu sen vakasin keen danggakook-ato noow-aso yiyi, tombe mem yalonggpayo gato javuh-ambe yiyi baale niwêêk hôôk Anutu me. ²⁰ ^uLe naambe yalonggpayo nayiis yiyi laah in nambe yaawiing va nipaya bôôy-ambe neep hôôk yalonggpayo om mak Anutu le bu dôôk nyevahaan vu yiyi, ond yalonggpayo gato javuh yi naah, in Anutu bopaata savok yalonggpayo la be lak va pin ani.

²¹ ^vSate va-so, naambe yalonggpayo me-nyiiis yiyi in nambe Anutu me-le bu dôôk yate nipaya nyevahaan e, ond mem yiyi naale niwêêk hôôk Anutu me, de yame naayêênin e. ²² ^wDe va pin sen yiyi navu kataangg vu Anutuu-to ond navu vu yiyi, in yiyi navu samu yite tanasin-ambe yiyi

^m 3:11 Jon 13:34 ⁿ 3:12 Jen 4:8 ^o 3:13 Mat 5:11-12; Jon 15:18-19 ^p 3:14 Jon 5:24; 1Jon 2:11

^q 3:15 Mat 5:21-22; Taato 21:8 ^r 3:16 Jon 13:1; Gal 1:4; 1Tes 2:8 ^s 3:17 Diu 15:7

^t 3:18 Jem 2:15-16 ^u 3:21 Hiblu 4:16 ^v 3:22 Mat 21:22

naawiing va sen nayi nivasaa-to. ²³ ^wTonde yite tanasin ond nambêênjo nambe yaambiing gaving Yesu Kalisi naambe Anutu Noow yi, osin yahengg gaving yiyi nohvu tanasin sen Yesu yoo nêêl vu yiyi-ato. ²⁴ ^xOmaaho sen navu samu Anutu-te tanasin-ato ond yoo nando hôôk Anutu lopayo, tonde Anutu nando hôôk lopayo, de wiing yite Vavi Vaambuung laam vu yiyi om yalak ni nambe Anutu nando hôôk yalonggpayo.

Vavi Vaambuung-ande tatuhin vaha-so

4 ¹^ySate va-so, hil sen danêêl nambe Vavi Vaambuung nando having sil-ambe sil danêêl tanasin-ato ond ham-ame ambiing gaving sil pin e. Nganjo ham oo sahi vêêl e naambe Anutu-te Vavi Vaambuung keen nando having sil me malis, in hil tanasin tatuhin vaha-so ngeeyaata lala dando lohvu taaku pin. ² ^zDe Anutu-te Vavi Vaambuung ond ham e anjak ni lak vakasin-anjo naambe hil pin sen danêêl langaah nambe Yesu Kalisi tu omaahonôôn keen, ond hil-anjo Anutu wiing Vavi Vaambuung la nando having sil. ³ ^aNganjo hil pin sen danêêl nambe Yesu me-tu omaahonôôn keen e, ond Anutu me-wiing Vavi Vaambuung la nando having sil e, malis. Yik ka tatuhin-anju laam vu omaaho sen nayiis ngaamong vu Kalisii-to, in bôôy yiyi hango nambe ka tatuhin-anju le naam, om gêên tok laam lung la.

⁴ ^bUnopasiv-aso, Anutu-te noow-aso ham, om ham ayiis ngaamong vu hil tanasin vaha tatuhin-aso be ham laanggôôl sil, in omaaho sen lukando ham alompayôô-ja ond niwêêk kaluuh omaaho sen lukando hil voon alondpayôô-to. ⁵ ^cHil-anju sil vu voon-ate, om yoo lanêêl vakasin voon-ate be hil vu voon langoyin sil lavand. ⁶ ^dDe yiyi vu Anutu-te, om omaahonôôn sen lalak Anutu ni ond sil dambe nanyend in yate vakasin, nganjo hil sen Anutu me-yite hil sil e, ond sil-ame dangoyin yiyi lavangg e. Ke, lak dangga nambêênjo ond yale anjak vakasin ani naambe laam vu Vavi Vaambuung vakasin keen-ate, tonde yik yale anjak vakasin vaalu ni naambe laam vu tatuhin vaha-so.

Ahe havingin danggakook Anutu

⁷ ^eSate va-so, yahengg gaving yiyi, in ahe havingin-anjo ond yoo danggakook vu Anutu, om hil sen ahend naving-ato ond Anutu wiing-ambe sil latu yite noow-aso, tombe sil lalak Anutu ni keen. ⁸ ^fOmaaho ti ahe me-naving hil e ond me-lak Anutu ni le, in ahe havingin ond yoo

^w 3:23 Jon 6:29; 13:34 ^x 3:24 Lom 8:9; 1Jon 4:13 ^y 4:1 Mat 7:15; 1Jon 2:18; 2Jon 7; 1Tes 5:21 ^z 4:2 1Ko 12:3 ^a 4:3 2; Jon 7; 1Jon 2:18 ^b 4:4 1; Jon 5:4-5; Mat 12:29
^c 4:5 Jon 15:19 ^d 4:6 Jon 8:47 ^e 4:7 1Jon 2:29 ^f 4:8 1Jon 4:16

danggakook Anutu. ⁹De Anutu wiing Noow nôôn timu Yesu lokalaam voon in nambe biing-ambe yiy mando metumin, ond manyinjo taato nambe Anutu ahe having yiy keen. ¹⁰^hYik ahe havingin danggakook nambêênjo, de me-nambe yahengg having Anutu le, nganjo Anutu yoo ahe having yiy-ambe wiing Noow Yesu laam voon-ambe tu yate mop sen Anutu kawiiy yate va nipaya naa-to.

¹¹ⁱSate va-so, Anutu ahe having yiy keen lôôt nambêênju, om yahengg oo gaving yiy halingg-aso keen ond mem. ¹²^jOmaaho ti me-yi me lak Anutu le, lemu yahengg gaving halingg-aso ond Anutu nando having yiy, tombe mem yite ahe havingin neep hôôk yalonggpaya keen lôôt.

¹³^kDe wiing yite Vavi Vaambuung laam vu yiy, om yalak ni nambe Anutu nando hôôk yalonggpaya de yiy nando hôôk Anutu lopayo. ¹⁴^lHey aahe lak hey amengg ondeey hey naanêêl langaah nambe Aamangg wiing Noow laam voon in nambe nôôh omaahonôôn pin vêêl. ¹⁵^mOmaaho ti nambe naanêêl Yesu langaah naambe Anutu Noow ond Anutu nando hôôk lopayo, de yoo nando hôôk Anutu lopayo. ¹⁶ⁿDe yalak ni osin yaawii-having

nambe Anutu ahe having yiy keen.

Ahe havingin ond danggakook Anutu, om naambe omaaho ti nando hôôk ahe havingin alopayo ond yoo nando hôôk Anutu lopayo, de Anutu nando hôôk lopayo. ¹⁷^oTonde yate ahe havingin natu bopaata nalak lôôt, in nambe busin sen Anutu sahi hil pin-ate vakasin-ato ond yame aanjêênin e, yiy oo baale niwêêk, in yiy nando voon-anjo ond yik lohvu Kalisi nandôô-to. ¹⁸Niyenin-ame neep hôôk ahe havingin alopayo le, nganjo ahe havingin keenaanôôn neep ond mem natiy niyenin nala. Niyenin-anjo dangga nambe gale naatovu nipaya nyevahaan. Omaaho ti niyenin neep vu yi ond ahe havingin-ame neep vu yi niwêêk lôôt e.

¹⁹Ahe havingin neep vu yiy-anjo in Anutu yoo ahe having yiy munggin. ²⁰De omaaho ti naanêêl naambe, “Sahengg having Anutu,” lemu yoo nayi hali paya lôôt, ond omaaho tatuhin ambu, in nayi hali lemu ahe me-naving e, om ahe le gaving Anutu sen me-yi me lak-ato naambe va? Malis. ²¹^pIn tanasin-anjo ond Kalisi nêêl vu yiy nambe omaaho ti ahe gaving Anutu ond yoo ahe gaving halindin-aso gaving.

Yaambiing gaving niwêêk ond le daanggôôl va voon-ate

5 ¹^qHil pin sen dawii-having nambe Yesuu-ju yi omaaho sen Anutu yoo holin yi vulôôt-ato, ond sil latu Anutu noondin, tonde hil pin sen ahend naving omaaho ti ond ahend naving omaahôô-ju noow

^g 4:9 Jon 3:16 ^h 4:10 Lom 5:8-10; 1Jon 2:2 ⁱ 4:11 Mat 18:33 ^j 4:12 Jon 1:18; 1Jon 2:5-6

^k 4:13 2Ko 1:22; 1Jon 3:24 ^l 4:14 Jon 3:17 ^m 4:15 1Jon 5:5 ⁿ 4:16 1Jon 4:8

^o 4:17 1Jon 2:28 ^p 4:21 Mat 5:44-45; Mak 12:29-31 ^q 5:1 1; Jon 4:15

having. ²Naambe yahengg naving Anutu be yiy navu samu yite tanasin, ond mem yalak ni nambe yahengg naving Anutu-te unoopasiv-aso. ³In yahengg naving Anutu ond dangga nambe yiy navu samu yite tanasin, tombe yame le aangge naambe yite tanasin animeen e. ⁴In hil pin sen Anutu wiing-ambe latu yite noondin-ato ond daanggôl va voon-ate, tonde va niwêêk sen naanggôl va nipaya voon-atêêto ond yik yalonggpaya la timu vu Anutu. ⁵Tonde omaaho lati naanggôl va voon-ate? Yik omaaho sen wii-having Yesu nambe Anutu Noow yii-to.

Va yaalapim taato Yesu Kalisi langaah

⁶Yesu Kalisii-ju laam-ambe lipis bel osin kaasêêh yite nihees la. De me-laam-ambe lipis bel amu le, nganjo lipis bel osin kaasêêh nihees, tonde Vavi Vaambuung nanêêl yi langaah having, in Vavi Vaambuung ond vakasin keen danggakook. ⁷Om va yaal-anjo nanêêl Yesu langaah,

⁸yik Vavi Vaambuung-ande bel osin nihees. Va yaal-anjo ond yik yaal ahondoos-ate vakasin neep ti. ⁹Yiy

nango vakasin sen omaahonôn danêêl langaah-ato, lemu vakasin sen Anutu nanêêl langaah-ato ond savok omaahonôn-ate la, de vakasin sen Anutu nanêêl langaah-ato ond nanêêl lak Noow Yesu. ¹⁰Hil pin sen londpayo nala timu vu Anutu Noow-ato, ond lalak ni vanuh nambe Yesu ond yi Anutu Noow keen. Lemu omaaho sen me-wii-having Anutu le, ond lohvu nêêl nambe Anutu navu tatuhin, in dangga nambe me-wii-having vakasin sen Anutu nêêl langaah lak Noow-ato le. ¹¹Om vakasin keen sen Anutu nêêl langaah-ato nambe Anutu vu metumin danggata-te vu yiy lung la, metumin-anjo dangga lak Noow Yesu timu. ¹²Hil pin sen Anutu Noow nando having sil-ato ond sil dala mop metumin-ate, de hil pin sen Anutu Noow-ame nando having sil-ato, ond me-dala mop metumin-ate le.

Yiy mando metumin danggata-te

¹³Sa kaavu vakasin-anjo laas vu ham in nambe ham anjak ni vanuh naambe ham sen ham alompaya nala timu vu Anutu Noow-ato, ond metumin danggata-te tu hamate va. ¹⁴Om yiy naale niwêêk hôôk Anutu me de yame naayêênin e, in yiy kataangg vati nohvu Anutu ka ond nango yate vakasin.

¹⁵Om sen yalak ni nambe yiy kataangg va ond nango yate vakasin, ond yik yalak ni having nambe va sen yiy navu kataangg-ato ond yiy hako lung la.

¹⁶Omaaho ti ji naambe hali nawiing va nipaya, le va nipayaa-ju me-lohvu nambe biing-ambe omaahô-jû na menama valok-ate le, ond hali

^r 5:3 Jon 14:15,23-24; 2Jon 6; Mat 11:30 ^s 5:4 Jon 16:33 ^t 5:5 Lom 8:37; 1Jon 4:4

^u 5:6 Jon 1:29-34; 1Jon 1:7 ^v 5:7 Jon 15:26 ^w 5:9 Jon 5:32-37; 8:18 ^x 5:10 Gal 4:6

^y 5:12 Jon 3:36 ^z 5:13 Jon 20:31 ^a 5:14 Jon 14:13; 16:23; 1Jon 3:21-22

^b 5:16 Mat 12:31

sen yii-to yoo kataangg Anutu tombe Anutu bu metumin vu yi. Manyinjo sa naanêêl lak hil sen silate nipaya me-lohvu nambe biing-ambe lana mend nama valok-ate le. De nipaya sen

biing-ambe omaahonôôn lana mend nama valok-atêêto ond hil dawiiing, lemu same naanêêl nambe ham kataangg Anutu in vaa-ju le. ¹⁷Va pin sen hil dawiiing-ambe me-nivalok-ato, ond manyinja nipaya, lemu va nipayaa-ju vaalu ond me-lohvu nambe biing-ambe hil lana mend nama valok-ate le.

¹⁸^cYalak ni nambe hil pin sen Anutu wiing-ambe sil latu yite noondin-ato ond me-dawiiing va nipaya le, in Anutu Noow oo nanggin sil anivasa om Omaaho Nipaya nama me-nalak sil e.

¹⁹^dYalak ni nambe yiy aatu Anutu noow-aso, de va voon-ate pin oo neep hôôk Omaaho Nipaya nama. ²⁰^eTonde yalak ni nambe Anutu Noow laam lung la tombe vêêl yalungg ak-ambe yiy nalak Anutu keen ani. Tombe yiy nando hôôk Anutu keen-anju lopayo in dangga nambe yaatu Noow Yesu Kalisi-te hil lung laa-to. Tonde Yesuu-ju ond Anutu keenaanôôn osin metumin danggata-te danggakook yi.

²¹^fOm noongg-aso, ham oo ganggin ham in anutu tatuhin vaha-so. Yik vakasin lung laa-ja.

^c 5:18 1; Jon 3:9; Jon 17:15 ^d 5:19 1; Jon 4:6 ^e 5:20 Jon 17:3 ^f 5:21 1Ko 10:14